

四庫全書

集部

欽定四庫全書

龍洲集卷七

宋 劉過 撰

五言律

代上韓開府

位號鈞樞等元勳
閱傳九重新洗日
一柱獨擎天戰
守籌帷外遷除下
筆邊衣冠圖盛事
不記幾貂蟬

上周少保

游戲公孤了歸來
不愛名昌黎前進
士司馬老先生有

節花宜晚無波水自平翳雲遮不得南極益晶明

其二

早被儒冠誤依稀老更侵科名數行淚岐路一生心自
惜亡猿木誰憐躍冶金使無鐘鼎志何地不山林

初伏闕上書得旨歸里上楊守秘書

郡大廬陵古分符得秘郎息爭民弭事課最米連檣水
隔蓬山遠風凝畫戟香少須官事了歸去玉為堂

其二

百計歸無策誰知禍有胎江河周顓泣城郭令威來訪
舊鬚俱白過家心欲摧故鄉非不好不是錦衣回

上范秘監

郡大當塗古分符得少蓬威如烏府在令與繡衣同鈴
閣紬書外花村賣劍中少需撫摩意來作玉堂翁

其二

疇昔經行路黃山更一過天涯知己少歲晚客愁多路
斷車生角冰堅水不波使君森畫戟聞此蓋如何

寄周益公

猥賤詩難化謹囂語不齊
長途難短堠小雨易深泥
逐利如爭鹿傷人類割雞
心雖懷益國夢亦畏江西

和大參相公

松深烟鎖逕月冷水明樓
日漲滄溟窄山陰古木秋
琴書超物表氣宇識神遊
突兀東南壯乾坤第一流

其二

氣壓三千界雲橫百尺樓
地靈絕興替木老閱春秋
杖

屢逍遙步琴書汗漫遊利名空役役回首愧禪流

其三

山邃龍蟠屈江昏蜃吐樓撞鐘千百指閱世八千秋僧
笑衣冠累天容杖屨游松梢清影碎薄月帶沙流

和子純韻

橋下水如箭驚奔萬古號溪毛翻碧帶石蘚襯銀濤天
外千層秀雲低數尺高垂垂興偏惡蓬鬢為詩搔

贈劉叔擬招山

不醉何勞飲無詩底用吟百年為客老一念愛鄉心草
路青原淚烟波白鷺心班超歸未得愁見舊家林

送楊伯子

天下少奇士況乎吾一州逢人問好字知子有源流蘭
砌多黃口蓬山半白頭誠齋知未可喚作小波休

送金陵胡撫幹仲芳

故家凋喪後初識澹庵孫玉樹明頭角氷漸吐話言荆
州得上幕楚壤帶中原我欲附舟去白魚朱橘煩

其二

共醉百斛酒千金一笑傾寄情桃葉渡弔古石頭城戰
守籌雄地更番出戍兵甕天畱不住圖畧遂西征

都中畱隨州李判官

幸自東南好西歸未可忙茶添橄欖味酒借蛤蜊香絕
品宜春醉新烹起日長倒囊煩厚載歸遣北人嘗

江頭送趙教即席同賦

東洲二三子相送黃鶴磯渭北烟樹合江南春水肥波

寬魚意足沙淺鳥痕微我亦欲東去斜風雨濕衣

送許閻二兄歸岳陽

岳陽舊遊處重來歲月更聯翩識吾友邂逅慰平生風
送故人遠槐催舉子驚扁舟更珍重萬里莫畱行

九日寄陳君舉舍人

白髮江湖暗青燈几席涼病身幾千百佳節又重陽命
也吾何奈天乎孰可量元龍樓百尺猶得慰行藏

除夜寄盧荊礪

見說盧夫子詩成手自書雪便金帳煖雲壓玉川居
椒葉儲名酒萍蘼薦野蔬夜寒揮犢鼻應念馬相如

寄桐廬程宰

路入嚴州去桐廬得暫過盤飧湯餅賤機杼綺羅多
令尹哦詩治居民酌酒歌吏人公事少門外可張羅

寄吳子雲

曾是乘軒客飄零老更窮棹船秋葉浦策杖桂枝叢
往事都如夢新詩不用工草廬消得幾不許卧隆中

吳尉東閣西亭

襲桂行香徑朱欄稍轉西水風飄石冷雲月隨簷低
基敗深杯罰詩豪健筆題舞忙釵鬟亂更為捧桑莢

其二

石板橋東閣軒窓如此華碧虛澄水鑑紅影浸霜花似
串歌雲駐如泥醉帽斜但驚風露冷飄落怕還家

湖口宰任伯厚挹清亭

正笑行役倦登臨心眼開野蘄千里見蜀贛兩江來老

覺樹如此涼生風快哉主人方好客不筭酒行盃

龔山長栖閣

愛客龔山長能容日日過栽培初種竹愛護乍生荷
堂對青山短門闕白日多細聽閒議論不似我狂歌

題禾川龍飛英疎榮閣

堂扁朱書字何人可得之三衙新統帥六館老宗師
文武無窮意江山不盡詩親恩如可報會有報君時

題王文叔燕堂

仕宦不愜意有家胡不歸林栖鳥反哺梁語燕于飛鷗鷺忘之久貂蟬貴者稀但存慈母健日日舞斑衣

其二

著屋圖書裡四山樓觀重蓴添張翰思橘當李侯封湖水自平淡花枝多冶容興來詩已就只可酒千鍾

西湖次第潤之韻

舊說西湖好逢春更一遊林逋山際宅蘇小水邊樓竹密柳堤開樹多花影稠天堂從此去真箇說杭州

雨華臺次胡仲芳韻

寒意濕芳草浮生吹浪花
繞臺皆峻嶺陳迹一飛霞
子醉辭吐鳳吾狂字落鴉
兒童應笑容風颭角巾斜

酒樓

夜上青樓去如迷洞府深
妓歌千調曲客雜五方音
藕白玲瓏玉柑黃磊落金
酣歌恣蕭散無復越中吟

登曠軒

去春曾與客攜手過橋來
寺陰松極美塢深桃不開
紅

塵萬里去白首一年回淨洗曠軒眼雪天閒看梅

鐵塔寺呈輕老

樹木有古意軒窓多野情斷岡城一帶齊岸草叢生醉
骨風蟬蛻病身沙鳥輕惜無東野筆琢句鬪僧清

同友遊新安寺

畏暑倦杯酌修廊散步行寺深藏古意蟬老帶秋聲去
就諸緣薄窮通一念輕更尋水清處容我濯塵纓

遊古山

信步作幽討有菴如此深佛燈明老屋秋日淡疎林栢
樹祖師意松楸老子心十年棄墳墓洒淚一悲吟

古山菴

薄醉來遊此西風吹帽紗倦鴉叢密樹涼雨濕秋花題
壁人何在哦詩句未佳一杯湯餅具坐到日西斜

題龍華寺壁

春事梅邊動荒江信馬行久窮知遠舉多瘦怯衣輕今
日龍華寺昔時闕姥城廢興吾已解一醉萬緣清

雁汭峯東林寺

雁汭泊船去岸頭
閒訪僧故人
畱少駐俗子
見何曾
佛屋擎天柱
心光續命燈
任渠狂到死
吾老慢騰騰

高塘庵

庵上木已拱
山前水可陂
崢嶸晦翁字
突兀大參碑
雲葉孤飛白
鳥羣反哺慈
傷人前輩盡
問道欲從誰

聿追菴

路轉羊腸曲
山藏蝸角深
樹多成蔭密
水少亦悲吟
露

草重陽淚風花寒食心摩挲墓銘看久立讀碑陰

元宵偶書

磊落倦遊客蹉跎但過曾有懷千不足自顧百無能舊
日名場酒他時夢境燈放歌聲激烈醉倒睡騰騰

寓東陽

元帥東陽主令君吾故人可憐九華客猶是一窮民古
者狂狷士人間自在身化工都不管何地有陽春

其二

不學老無似艱難却飽諳
遠從陶靖節來訪杜征南意
到羹尊適貧猶食薺甘惜無廬可卧尚遶鵲枝三

泊船吳江

草樹連塘岸人家半橘洲
暖寒尋酒去覺困得陰休
逆境年年夢勞生處處愁
天涯倦行客明日又蘇州

送客剡溪

送客山陰路春風散馬蹄
縱觀神禹穴深去子猷溪
嫩草綠於染珍禽嬌已啼
去程千萬里步步有雲梯

闕景和進納長安相值西采石話及家事因對
酌

未有還家策故鄉吾太和龍洲沙石健快閱水雲多場
屋科名累江湖歲月磨茅柴一杯酒相對奈愁何

方竹杖

鶴骨風前瘦龍姿雨後鮮鋒稜四面峻節操一生堅荷
篠行隨適看山依最便從教方有礙終不効規圓

挽拙庵楊居士

前輩晨星似如公抑又希榆邊遊已倦菊徑晚方歸聽
雨風同老沖天子欲飛傷心彈指頃一夢故人非

其二

尚憶龍蟠國城西作客時有山皆載酒無日不賡詩風
雨交游散江湖淚眼悲百年心事在只有鳳雛知

挽蘇吏部

變世徵文獻逢時仕學優愛遺邊郡在官止外郎休日
黑新塋夜溪橫舊隱秋從游老賓客欲替二孤愁

龍洲集卷七

欽定四庫全書

龍洲集卷八

宋 劉過 撰

七言絕

上益公壽十絕

金烏

金翰振曉近天威
玉宇循環晝影遲
曾上天門頭上看
曖然可愛是冬曦

玉兔

雲淡星疎月有光
廣寒仙府歲偏長
多應自製延年藥
振古長因桂子香

寶龜

納錫曾看上九江
又聞詹事奉儲皇
巢成荷上窺仙景
三顧溪中賜印章

玄鶴

緱山橘井與青田
驅策風雲反列仙
名號橫空心萬里
九臯聲動九重天

壽鹿

年永曾聞葛稚川玉京何處錦紋鮮
賞花應制嘉賓宴
小雅當為第一篇

丹桂

少壯東堂奏捷功
浮香仙籍繼家風
年年占得中原景
一顆冰輪照九穹

影木

枝如華蓋聳瀛洲
永世香風荏苒浮
特有羣仙來弭節

細聽鳴鳳碧枝頭

古栢

冰條雪葉節高堅
臺憲風生凜凜然
可羨堪為梁棟用
至唐千載尚三千

佳菊

壽客尤宜在壽鄉
鉅花的皜傲新霜
更歌華壽今歸去
尚有淵明野趣香

蒼官

東封已受大夫封又入丁公吉夢中祇道濟時作舟楫
茯神尤有濟人功

代吳守與趙侯壽

地蟠江漢節巍然勁氣扶輿幾倍年白玉丹砂浩無數
夜光隨處見山川

其二

氣運由來有盛衰循環久已見天機黃山雲散無塵滓
上將騰光入紫微

其三

虎頭燕頤是奇謀
玉帳兵形象水流
此去關河應不遠
上方擬築望英樓

其四

文偉當年記鄂城
崎嶇蜀道播英聲
何如衣錦粉榆社
卧護元戎十萬兵

其五

夜上南樓望玉京
將星光底壽星明
不須便即騎黃鶴

且為皇家致太平

呈徐侍郎兼寄辛幼安

當年今日誤承恩
自倚容華託至尊
門外遊絲難駐日
依然青草暗長門

其二

猿臂將軍戰不休
當時部曲已封侯
夜深忽夢燕山月
猶幸君王晚更收

官舍阻雨呈徐判部

學弄筆頭兒戲事風流眼底亦無之汪孫已往周洪沒
本分作家今是誰

其二

竹隱先生名滿世自為舉子已詩聲春風若入五花判
莫遣紫微紅藥驚

其三

秋霜烈日生前操流水行雲意外詩未必中興四君子
於斯二者更兼之

其四

潦倒傍門羞騎馬倦遊老欲寄崑山留將造請嘯口
慷慨狂歌泉石間

其五

世間別有人才在臺閣招徠恐未多半老江湖與岩穴
為公一賦草廬歌

呈辛稼軒五首

精神此老健于虎紅頰白鬚雙眼青未可瓢泉便歸去

金野史卷八
要將九折重朝廷

其二

閉門翹足觀山睡
松檜鬱然雲氣高
說夢向人應不信
碧油幢下有旌旄

其三

書來賜以蘭溪酒
下視潘葑奴僕之
吾老尚能三百盞
一杯水不值吾詩

其四

卧廬人昔如龍起
足魏吳如等閒
若結梅花為保社
林逋只合住孤山

其五

書生不願黃金印
十萬提兵去戰場
只欲稼軒一題品
春風侯骨死猶香

投誠齋

省齋去國良齋老
不獨宣尼嘆乏才
試數諸公有名者
廬陵那得兩誠齋

其二

蓬萊東觀是通衢
經國文章要鉅儒
頓著五花猶不判
却于注易下工夫

其三

畫戟門邊春晝長
鼎新模範宿淮陽
吏人剝啄報公事
一瓣濃薰班馬香

其四

知愚上下爾自異
尺寸不差公短長
畢竟昌黎仍舊好

何曾人說段文昌

其五

綾衾厭入承明直却把一麾江上來雲氣隔天迷望眼
不堪花落幾宮槐

其六

夫子聲名號浙西作成文事欲何為達人曾次元無翳
芥子須彌我獨知

其七

初政寰區望太平
黎民樂政喜更生
裴公用舍無輕重
天下從茲有重輕

上吳居父

時平無事清吟好
衛霍貪功未足奇
曾是一篇人膾炙
四方傳誦卧龍詩

其二

廟堂陶鑄人才盡
流落江淮老病身
尚踏槐花隨舉子
不知鄧禹是何人

呈王山父

疎烟淡淡樹重重
略得西南有路通
鐘板不鳴山寺靜
閉門人在月明中

其二

辦得茆廬我便歸
玉堂何處有梅枝
歲寒老樹雖荒寂
會有鵲殘春盡時

和危府教

先生場屋文之虎
氣懾豺狐自不知
老去莫嫌官尚冷

金華先生集卷八
灞橋風月要新詩

其二

天上羣仙臺望居
芹宮未是辱泥途
莫邪變化須臾事
一點一鎔金在爐

其三

行脚諸方履歷深
似和禪子寄叢林
試拈朝報一轉寤
以道觀之無損心

送胡仲方

略無一物將人意更逐行軒去似飛騰把清吟供惠遠
聊將遠出當依歸

其二

鄭公句在貧何恨劉毅家寒淚一揮窮達莫言鄉義重
此行畢竟是耶非

寄沈居進三國志

十年鉛槧鬢絲秋獨抱成書四海遊三國諸人應夢裡
一番公案又從頭

其二

萬死中原百戰爭，流芳遺臭各垂名。
思量陳壽已饒舌，又費先生一管城。

寄張柬之

見山堂上山如畫，二十年前曾客來。
風絮滿城歸不得，江南老卻賀方回。

其二

紫騮借得將軍馬，垂柳西湖第一橋。
欲傍酒家做寒食，

腐儒何日有狐貂

東胡衛道

淮北山南幕府開
江淮誰念有遺才
出門萬里長安道
乞我子潛馭馬來

其二

結束弓刀鞍馬間
精神矍鑠我猶艱
褒衣博帶休相笑
前帶頭巾金帽環

過無錫見李祭酒

金史卷八
戀樹棲禽暖不飛不知弓繳有危機
季鷹若悟蓴鱸好
應悔江東不蚤歸

其二

高門掃日鳴珂里吹竹彈絲煖響中
寂寞一區如此宅
世間却有兩揚雄

其三

新變文章學未成有雲無路致吾身
應逢塾角諸生笑
欲效林宗却整巾

贈經長老

菜肚老人禪已飽
憂人從吏作詩僧
客來無處著歡喜
一語不曾談葛藤

題自然足軒

秋光萬斛潑疎簾
瘦玉蕭蕭拂畫簷
鵲尾爐中香篆冷
矮窻袖手對楞嚴

其二

翠竹無多第一奇
正憂喧聒俗人知
清風自足老僧用

只是窓前無好詩

其三

有竹蕪生不費鉏亭亭楚玉影癯癯風師自是識人意
何用縱橫十萬夫

東林寺

爾自貪癡不肯閒江南多少好青山老夫為不愛官職
買得狂名滿世間

越州能仁寺壁

流年轉眼一飛梭
如此頭顱奈老何
狼籍落花春不老
竹雞啼處雨聲多

書僧舍壁

綠楊染水濃如畫
天氣欲晴風自和
二月杏花猶未放
一春分外覺寒多

西林菴

雪汁融融溪棹回
此山林竹亦佳哉
看殘未了槐岩在
筍蕨肥時又一來

山末

山末疎紅尾尾霞晚烟叢薄是人家移船更喜吹香好
狗橘花開媚淺沙

龍洲集卷八

欽定四庫全書

龍洲集卷九

宋 劉過 撰

七言絕句

遊清潭呂賓益蟠谷十絕

清潭

一潭清淨久無泥
潭岸無泥石更圍
擬待月明垂釣去
前溪雨足怕龍歸

蟠谷

金剛經
卷九
逶迤路逐驚蛇去轉盼不知身已高雪積萬層山四合
碧油幢外有旌旄

飲綠

野花紅白倚岩開只可臨風自一杯謹莫放教公子見
恐攜窈窕入籠來

掇英

老子垂垂秋露下九月空山天氣寒黃花剩開且勿剪
留得一枝烟雨看

初秋

香不求知色正青清于九畹見飄零山中若有離騷伴
痛飲吾知勝獨醒

漱玉

濕雲將雨過溪東石澁灘鳴水勢雄忽作晚晴秋更好
月來林外透玲瓏

含暉

帝所森嚴寂不喧九關虎豹守天門何人奏事含風殿

日晏鳴珂下紫垣

香徑

一花帶蕊香氣滿
何況叢生樹兩行
風露益高秋雨足
請君來此撼琳琅

谷庵

穹廬架屋石峻嶒
香火西風只一僧
日晚課經猶未了
閉門先點佛前燈

碧蓮峰

前山崛起青蓮朶色掃晴空如葉開若擬空花猶未了
空中安得有峰來

三登徑山而雨或曰龍王相迎予笑而戲以詩
細雨霏霏洒路塵龍神有意逐佳賓世間小節成姑息
盍念熬煎烈骨人

遊古仙岩

白蘋風裏步清秋來作靈岩古洞遊笑倚飛雲訪仙迹
夕陽無語伴人愁

欲遊閭阜山

仙梯難上塵緣重
俗駕勒回仙有靈
烟靄模糊雨昏黑
數峰疑在眼中青

西湖

西湖湖上山如畫
二十年前曾客來
飛絮滿城歸未得
江南老却賀方回

湖上

五行撩我到錢塘
花底題詩句亦香
莫惜高吟三十韻

敢煩詩伯為平章

弋陽渡頭

車聲盡日滑黃泥
怕聽空桑叫竹雞
風雨不知春早晚
柳條拖綠半江低

初入平氏書院

雪屋彈琴泛作聲
寂無人語紙牕明
倦遊識破諸緣妄
心與梅花一處清

湖口阻風

冒雪衝霜已十程狂風乃敢厄吾行無人說向江神道
莫待明年却世情

蘄州道中

如箭陰風劈面吹雪花斜夾雨垂垂
胷中自有平邊策
路入蘄州冷不知

自宣溪過早禾渡

雨後斜陽未見晴曉看紅日報
窻明筍輿十里宣溪路
剗地濃雲脚裏行

其二

梅欲攬春菊送秋早來渡口晚烟收風從灘上催船過
滾起寒沙一併流

釣臺

百尺難量大丈夫問他出處意何如乾坤已付劉文叔
從此先生歸釣漁

龔山長栖閣

不知此是何人宅楊柳雖低屋却高見說圖書皆長物

六經之外有離騷

村店

林深路轉午雞啼
知有人家住隔溪
一鳥闌紅春欲動
酒帘正在杏花西

其二

溪邊猶掉酒船回
冷水灣頭雨意開
一路有詩吟不得
當初悔不共君來

春日書事

薄雲籠日護初晴沙岸朝來春水生間傍柳堤騎馬去
一鞭春色柳風輕

春歸

百花開盡到酴醾一片春心又欲歸可恨東風留不得
謾教啼鳥怨斜暉

和送牡丹韻

娉娉嫋嫋洛陽花合在瑤池阿母家乞與老人渾不愛
白髯相對毯烏紗

萱草

不盡人間萬古愁，却憑萱草解忘憂。
開花若總關憔悴，誰信浮生更白頭。

梅花

人間不盡春來意，恰見一枝寒影疎。
更得和羹幾時在，祇今風月尚新除。

其二

香意惱人休不得，荒林月裏夜相過。
花應笑客有底急。

客若不來花奈何

其三

凍雲垂垂雪欲落雨澁風慳如此寒
分折南枝與君看
老夫自要北枝看

其四

高門拂日瓊為樹呼我不來那肯過
不知此花有何好
寒鄉日日用亡何

其五

寂無人語斷回程日落未落孤山橫平湖水濶何許去
傍竹邊松自好行

雪

醉枕醒來夜未央倦身展轉厭藜床映窓色皎猶疑月
刮骨寒知不是霜

喜雨

誰借長鞭策懶龍黃梅水漲舳舻通還知君子憂時切
常在桑麻稼穡中

其二

北方旱氣與兵連
猶恐淮舟亦蔓延
數日下田新雨足
不應千里不同天

聞杜宇

杜宇幾聲烟靄外
相思只在蜀山陰
閒愁不共花飛盡
贏得傷春一片心

聞鷺

東風扶日上花枝
恰恰幽禽弄暖時
百轉忽驚春夢破

間關石上話相思

雁

朝隨漢使到天涯
暮與江鷗宿浦沙
歲晚客途營一飽
稻粱多處即為家

其二

萬重山水萬重雲
歲歲江南客此身
天末西風晚來急
數行飛下一汀蘋

漁翁

短篷三尺寄烟波
短褐悠悠歲月過
江海不知戎馬事
酒酣搔首唱漁歌

聽阮

絳蠟攢花夜氣橫
樽前更著許風情
却將江上風濤手
來聽紗窓摘阮聲

閒步

山徑無人鳥篆沙
杖藜閒看摘新茶
錦綳委地筍翻穉
黃玉滿林松帶花

夢覺

夢回斜日轉花陰時有黃鸝送好音
高卧草廬人不識東風啼鳥獨知心

感舊

羅結同心柳帶青碧桃香裡寄將迎
春風重到憑欄處腸斷江樓不忍登

龍洲集卷九

欽定四庫全書

龍洲集卷十

宋 劉過 撰

五言絕

遊郭希呂石洞二十詠缺其一

清曠

筍輿咿啞來路轉此歇脚長風挾秋下深意滿萬壑

深秀

蒼髯萬松宮窈窕一徑開請回俗士駕切莫呵殿來

書院

力學如力畊勤惰爾自知便使書種多會有歲稔時

谷口

水流自何許遠欲窮其源石梯苔蘚層微有屐齒痕

月峽

兩崖限東西裡有一帶天老巖更多事駕月下潺湲

桂壑

叢叢萬橫枝羅生雜松篁不以羅穴幽歲晚政自香

小爛柯

遊戲一談棋歲月駒隙過不如兩忘機石上跏趺坐

傾月

去去山轉深樹下益淒冷時有月烏飛間碎梧桐影

閑雲

仙宮已降勅雅有新遷除乞為此閣使雲物屢卷舒

高碧

小山碧巉巖直上與天齊詩成欲磨崖藤蘿費扳躋

石井

銀床遶周遭一規寒浸水試敲拄杖看恐觸蛟龍起

壺天

逆溪隨水行更上紫翠峰朱欄忽飛閣映帶烟霞重

玉珮

借榻卧雲屋欹枕仔細聽疑鳴珂聲不知水泠泠

飛雪

山前大飛雪路有何處入蒙茸亦花飛冷澣征衣濕

笙鶴

木末俯清軒獨立久延佇何人騎鶴來髣髴吹笙侶

韜玉

至寶不自獻韜藏亦英華餘香被草木秀擢幽岩花

倚劍

石壁自磨礪三嘆用不久如去到人間為儂洗塵垢

藥圃

古文不可賣未覺賣藥非侵晨荷鋤徑暮得芝朮歸

玉泉

石礫沙沃盡悠悠潭影斜塵襟不忍濯為惜無玷瑕

缺其一

賦

獨醒賦


有貴介公子生王謝冰玉其身委身糟丘度越醉鄉一日謂劉子曰麴蘖之盛棄土相似釀海為酒他人視之以為酒耳吾門如市吾心如冰獨不見吾廳事之南蓋

亦吾之習次哉矮屋數間琴書罷陳日出內其有餘閒
散菠菜子一升摩挲手植之竹枝葉蔚然其色青此非
筦庫之主人乎其實超衆人而獨醒劉子曰公子不飲
何有于醉鄉猶不知醒為何謂若我者蓋嘗從事於此
矣少而桑蓬有志四方東上會稽南窺湘西登岷峨
之顛北遊爛漫乎荆襄悠悠風塵隨舉子以自鳴上皇
帝之書客發鴻寶之秘藏愧乎雄辭而偉文得不踰以
一言放之如萬馬之駿奔半生江湖流落齟齬追前脩

今不逮途益遠而日暮始寄於酒以自適終能酩酊而涉其趣操卮執瓢拍浮酒船痛飲而談離騷白眼仰卧而看天雖然此自其大凡爾有時墜車眼花落井顛倒乎衣裳弁俄側而不整每事盡廢違昏而莫省人猶曰是其酩酊者然也至於起舞捋鬚不遜罵坐芥視天下之士以二豪為螟蛉與螺贏兆謗稔怒或賈竒禍矧又欲多酌我耶今者不然我非故吾覺昨非其未遠掃習氣於一除厭飲盃酒與瓶甕而日踈清明宛在其躬泰

宇定而實虛譬猶醯醢出雞蓮生淤泥糞壤積而菌芝
疾驅于通道大都而去其疾藜當如是也豈不甚奇矣
哉夫以易為樂者由於險以常為樂者本於變是知汨
沒於是非者始真是出入於善惡者始真善今公子富
貴出於襁褓詩書起於門閥頡頏六館世襲科甲遊戲
官箴嚴以自律所謂不類之珠無瑕之璧又何用判醒
醉於二物公子聞而笑曰夫無倫者醉之語有味者醒
之說先生舌雖濶翻而言有條理宵次磊落而論不訛

雜子固以我為未知醒之境界我以子為強為醉之分
別於是取酒對酌清夜深沉撥活火分再紅燭花燦兮
熒熒淡乎相對而忘言不知其孰為醉而孰為醒



龍洲集卷十

欽定四庫全書

集部

龍洲集卷十一至
五

詳校官庶吉士臣翁樹培

主事臣呂雲棟覆勘

總校官原任中允臣王燕緒

校對官中書臣汪學金

謄錄監生臣鄧培善

欽定四庫全書

龍洲集卷十一

宋 劉過 撰

詞

六州歌頭

弔岳王廟

中興諸將誰是萬人英身草莽人雖死氣填膺尚如生
年少起河北劍三尺弓兩石定襄漢開虢洛洗洞庭
北望帝京狡兔依然在良犬先烹過舊時營壘荆鄂有
遺民憶故將軍淚如傾說當年事知恨苦不奉詔偽

耶真臣有罪陛下聖可鑒臨一片心萬古分茅土終不
到舊姦臣人世夜白日照忽開明袞佩冕圭百拜九原
下榮感君恩看年年二月滿地野花春鹵簿迎神

六州歌頭

鎮長淮一都會古揚州昇平日珠簾十里春風小紅樓
誰知艱難去邊塵暗戎馬擾笙歌散衣冠渡使人愁屈
指細思血戰成何事萬戶封侯但瓊華無恙開落幾經
秋故壘荒丘似含羞 悵望金陵宅丹陽亂山不斷綢

繆興亡夢榮枯淚水東流甚時休野灶炊烟裏依然是
宿貔貅嘆燈火今蕭索尚淹留莫上醉翁堂看濛濛雨
楊柳絲柔笑書生無用富貴屈身謀騎鶴來遊

六州歌頭

淮西帥李訥和仍為書廟額

高皇神武善駕馭豪英攘北敵驅羣盜命天膺救蒼生
奈變繞沙漠隔溫清屈和好召大將歸兵柄列樞庭公
指汴京威以振河洛不顧身烹失一時機會嗟困躋吾
民痛岳家軍就扶傾久沉冤憤七十載還復遇帝王

真表遺烈錫王號日照臨激士心始識安劉計寧禍已
是忠臣我來傳訪壁壘想精明英氣凜然若在題匾昭
揭天恩笑原頭荒草死不能春交怨人神

沁園春

代壽韓平原

玉帶金魚綠髻朱顏神仙畫圖把擎天柱石空留綠野
濟川舟楫閒倚西湖天欲安劉公歸重趙許大元勲誰
得如平章看人如伊呂世似唐虞不須別樣規模但
收攬人才多用儒况自昔軍中膽能寒敵而今宵次氣

欲吞吳紫府真人黑頭元宰收歛神功寂似無歸來好
正芝香棗熟鶴瘦松臞

沁園春

張路分秋閱作

萬馬不嘶一聲寒角令行柳營見秋原如掌鎗刀突出
星馳鐵馬陣勢縱橫人在油幢戎韜總制羽扇從容
裘帶輕君知否是山西將種曾系詩名 龍蛇紙上飛
騰看落筆四筵風雨驚便塵沙出塞封侯萬里印金如
斗未愜生平拂拭腰間吹毛劍在不斬樓蘭心不平歸

來晚聽隨軍鼓吹已帶邊聲

沁園春

送辛幼安赴桂林官

天下稼軒文章有用看來未遲正三齊盜起兩河民散
勢傾似瀉國覆如盃猛士雲飛狂奴灰滅機會之來人
共知何為者望桂林西去一騎星馳 離筵不用多悲
喚紅袖佳人分藕絲種黃柑千戶梅花萬樹等閒遊戲
畢竟男兒入幕來南籌邊如北翻覆手高來去棋公餘
盡且玉簪珠履倩米元暉

沁園春

寄辛稼軒

古豈無人可以似吾稼軒者誰擁七州都督雖然陶侃
機明神鑒未必能詩華袞何如相羊聊爾千騎東方侯
會稽中原事縱匈奴未滅畢竟男兒平生出處天知
算整頓乾坤終有時南湖賓客侵尋去矣江西戶口
流落何之盡日樓臺四邊屏障目斷江山魂欲飛長安
道美世無劉表王粲疇依

沁園春

寄孫竹湖

問訊竹湖竹如之何如何未歸道吳山越水無非佳處
來無定止去亦何之只怕秋來未能忘耳心與輕雲一
樣飛愁無奈但北窓寄傲南澗題詩 人生了事成痴
笑世上久無公是非恨雲臺突兀無君子者雪堂留客
有美人兮疎雨梧桐微雲河漢鍾鼎山林無限悲陽山
縣是昌黎誤汝汝悞昌黎

沁園春

蘆菊澗座上時座中有新第宗室

一艇橫空飛過洞庭又為此來有汝陽璉者唱名殿陛

玉川公子開晏樽罌四舉無成十年不調大宋神仙劉
秀才如何好將百千萬事付兩三杯 未嘗憾憾於懷
嘆自古英雄安在哉看錢塘江上潮生潮落姑蘇城
裡花謝花開盜號書生強名舉子漸老雪從頭上催誰
羨汝三千珠履十二金釵

沁園春

寄辛承旨時承旨招不赴

斗酒羶肩風雨渡江豈不快哉被香山居士約林和靖
與坡仙老駕勒吾回坡謂西湖正如西子濃沫淡粧臨

照臺二公者皆掉頭不顧只管傳盃 白言天竺去來
圖畫裡崢嶸樓閣開愛縱橫二澗東西水遶兩峰南北
高下雲堆逋曰不然暗香浮動不若孤山先訪梅須晴
去訪稼軒未晚且此徘徊

沁園春

送友赴營道宰

萬里湖南江山歷歷此吾舊遊看飛鳬仙子張帆直上
周郎赤壁鸚鵡滄洲盡吸西江醉中橫笛人在岳陽樓
上頭波瀾靜泛洞庭青草重整蘭舟 長沙會府風流

有萬戶娉婷簾玉鉤恨楚城春晚岸花檣燕還將客送
不是人留且喚陽城更招元結摩詰三闌歌詠休心期
處筭世間真有騎鶴揚州

沁園春

贈豐城王禹錫

自注銅瓶作梅花供尊前數枝說邊頭舊話人生消得
幾番行役問我何之小隊紅旗黃金作印直待封侯知
幾時盃行處想淋漓一醉明月東西如椽健筆鸞飛
重為寫春風陌上詞便平生豪氣消磨酒裡世間此樂

道玉山自倒不用人推

沁園春

蘇州黃尚書全夫人眷聚遊報恩寺

縱轡徐驅兒童聚觀神仙畫圖見杏黃衫薄穿來香路
藕絲裙軟扶上籃輿傍柳題詩穿花勸酒嗅藻扳條
得自如山行處有松篁夾道不用傳呼 清泉石下盤
紆美風景江淮各異殊記東坡賦好紗籠舊壁西山句
妙簾捲晴虛白玉堂深黃金印大無此文君載後車盃
行處想淋漓醉墨真草行書

八聲甘州 送湖北招撫吳獵

問紫嵩去後漢公卿不知幾貂蟬誰能借留侯筋著祖
生鞭誰道班聲萬里河洛尚烽煙誰識道山客衣鉢曾
傳 共記玉堂對策欲先明大義次第籌邊况重湖八
桂袖手已多年望中原馳驅去也擁十州牙纛正翩翩
春風早看東南王氣飛繞星纏

四犯剪梅花 上建康錢大郎壽

水殿風涼賜環歸正是夢熊華旦

解連環

疊雪羅輕稱

雲章題扇

醉蓬萊

西清侍宴望黃傘日華籠輦

雪獅兒

金券三王玉堂四世帝恩偏眷

醉蓬萊

臨安記龍飛鳳

舞信神明有後竹梧陰滿

解連環

笑折花看索荷香紅

染

醉蓬萊

功名歲晚帶河與礪山長遠

雪獅兒

麟脯盃

行戎薦坐穩內家宣勸

醉蓬萊

小桃紅

在襄州作

晚入紗窓靜戲弄菱花鏡翠袖輕勻玉纖彈去小粧紅

粉靚行人愁外兩青山與尊前離恨宿酒醺難醒笑

把香肩並暖借蓮腮碧雲微透暈眉斜印最多情生怕
外人猜拭香津微搵

天仙子

初赴省別妾于三十里頭

別酒醺醺渾易醉回過頭來三十里馬兒不住去如飛
牽一憇坐一憇斷送殺人山與水是則是青山終可
喜不道恩情拚得未雪迷村店酒旗斜去則是住則是
煩惱自家煩惱你

行香子

同郭季瑞訪舊不遇

一項窻兒明快料想那生不在薰籠脫下舊衣裳件件
香難賽 匆匆去得忒煞這鏡兒也不曾蓋千朝百日
不曾來沒這些兒個采

龍洲集卷十一

欽定四庫全書

龍洲集卷十二

宋 劉過 撰

詞

賀新郎

彈鋏西來路記匆匆經行數日幾番風雨夢裡尋秋秋
不見秋在平蕪遠渚想雁信家山何處萬里西風吹客
鬢把菱花自笑人憔悴留不住少年去男兒事業無
憑據記當年擊筑悲歌酒酣箕踞腰下光芒三尺劍時

解挑燈夜語更思對燈花彈淚喚起杜陵風雨手寫江
東渭北相思句歌此恨慰羈旅

賀新郎

贈鄉人朱唐卿

多病劉郎瘦最傷心天寒歲晚客他鄉久大舸翩翩何
許至元是高陽舊友便一笑相歡攜手與問武昌城下
月又何如揚子江頭柳追往事兩眉皺 燭花自剪明
如晝喚青娥小紅樓上慇懃勸酒昵昵琵琶恩怨語春
筍輕籠翠袖看舞徹金釵微溜若見故鄉吾父老道長

安市上強如舊重會面幾時又

賀新郎

贈張彥功

曉印霜花步夢半醒扶上雕鞍馬嘶人去嵐濕青絲雙
轡冷緩控野梅江路聽畫角吹殘更鼓悲壯塞聲撩客
恨甚貂裘重擁愁無數霜月白照離緒青樓回首家
何處早山遙水濶天低斷腸烟樹誰念天涯牢落況輕
負煖烟濃雨記酒醒香銷時語客裡歸鶻須早發怕天
寒風急相思苦應為我翠眉聚

賀新郎

遊西湖

睡覺啼鶯曉醉西湖千場日日買花簪帽去盡酒徒無人問惟有玉山自倒任拍手兒童呼笑一舸乘風翩然去避魚龍不見波聲悄歌韻遠喚蘇小神仙路遠蓬萊島紫雲深參差亭榭有烟花遶人世紅塵西障日百計不如歸好付樂事與他年少費盡柳金梨雪句問沉香亭北何時召心未愜鬢先老

賀新郎

平原納寵姬奏方響席上賦

倦舞輪袍後正鸞慵鳳困依然怨新懷舊別有艷粧豪
勢樂春筍微揎翠袖試一曲琅璈初奏莫放珠簾容易
捲怕人知世有梨園手雙臂冷釧金瘦 燭花對剪明
於畫正畫堂深曲屏山掩翠炭紅圍獸錯認珮環猶未
是依約雛鶯嚀柳聽點點銅壺銀漏一片雄心天外去
為聲清響徹雲霄透人醉也尚呼酒

賀新郎

閨怨

院宇重重掩醉沉沉亭陰轉午繡簾高捲金鴨香濃噴

寶篆驚起雕梁語燕正架上荼蘼開遍嫩萼梢頭舒暈
臉似月娥初試宮粧淺風力嫩異香軟佳人無意拈針
線遶朱欄六曲徘徊為他留戀試把花心輕輕數暗計
歸期近遠奈數了依然重怨把酒問春春不管枉教人
只恁空腸斷腸斷處怎消遣

賀新郎

贈倡

老去相如倦向文君說似而今怎生消遣衣袂京塵曾
染處空有香紅尚軟料彼此魂銷腸斷一枕新涼眠客

舍聽梧桐疎雨秋風顫燈暈冷記初見樓低不放珠
簾捲晚粧殘翠蛾狼籍淚痕流臉人道愁來須殢酒無
奈愁深酒淺但託意焦琴紈扇莫鼓琵琶江上曲怕荻
花楓葉俱淒怨雲萬疊寸心遠

跋云余試牒四明賦贈老倡至今天下兩禁中
皆歌之江西人來以為鄧南秀調非也

水龍吟

謫仙狂客何如看來畢竟歸田好玉堂無此三山海上

金瓶梅詞話卷十二
虛無縹緲讀罷離騷暗香猶在覺人間小任菜花薺麥
劉郎去後桃開處春多少一夜雪迷蘭棹傍寒溪欲
尋安道而今縱有劉郎冰柱有知音否想見鸞飛如椽
健筆檄書視草算平生白傅風流未肯讓香山老

念奴嬌

回侍郎李大異

知音者少算乾坤許大著身無處直待功名成始退何
日可尋歸路多景樓前垂虹亭下一枕眠秋雨虛名相
悞十年枉費辛苦不是奏賦明光獻書北闕無驚人

之語我自匆忙天未肯贏得衣裾塵土白壁堆前黃金
酬笑付與君為主尊鱸江上浩然明日歸去

滿江紅

同襄陽卽泛湖

獵獵風蒲畫船轉碧波灣浦都不是柳汀菰岸橘洲梅
渚指點山公騎馬地經由羊祜登山處悄一如人在水
晶宮消煩暑薰風動羅帷舉秦箏奏凌波舞拚冰壺沉
醉晚涼歸去侵岸一篙楊柳浪過溪幾點荷花雨倚樓
人十里凭欄干神仙侶

滿江紅

高帥馮太尉席上

敵面風輕一兩點海棠微雨春總在英雄元帥曉來遊
處樓閣萬家簾幙捲江郊十里旌旗駐有黃鸝百舌轉
新聲垂楊舞寒食近笙簫鼓車馬鬧銅鞮路拚尊前
一醉無花為主風韵可將圖障畫笑談盡是文章語問
何如鄒湛赴江頭陪羊祜

水調歌頭

晚春

春事能幾許密葉著青梅日高花困海棠風暖想都開

不惜春衣典盡只怕春光歸去片片點蒼苔
能得幾時好追賞莫徘徊
雨飄紅風換翠苦相催人生行樂且須痛飲
莫辭杯坐則高談風月醉則恣眠芳草醒後亦
佳哉湖上新亭好何事不曾來

水調歌頭

刀劍出榆塞鉛槧上蓬山得之渾不費力失亦止如閒
未必古人皆是未必今人俱錯世事沐猴冠老子不分
別內外與中間酒須飲詩可作缺休彈人生行樂何

事催彼鬢毛斑達則牙旗金甲窮則蹇驢破帽莫作兩
般看世事只如此自有識鴉鷺

祝英臺近

同妓遊帥司東園

窄輕衫聯寶轡花裡控金勒有底風光都在畫欄側日
遲春煖融融杏紅深處為花醉一鞭春色對嬌質為
我歌捧瑤觴歌聲動阡陌蝶似多情飛上鬢雲碧晚來約
住青驄踏花歸去亂紅碎一庭風月

祝英臺近

笑天涯還倦客欲起病無力風雨春歸一日近一日看
人結束征衫前呵騎馬腰劍上隴西平賊鬢紛白只
可歸去家來無田種瓜得空抱遺書憔悴小樓側杜鵑不
管人愁月明枝上直啼到枕邊相覓

轆轤金井

舞姬席上贈馬簽判

翠眉重拂後房深自喚小蠻嬌少繡帶羅垂報濃妝纔
了堂虛夜悄但依約鼓簫聲開一曲梅花樽前舞徹梨
園新調高陽醉山來倒看鞋飛鳳翼釵痕微溜秋滿

東湖更西風涼早桃源路杳記流水泛舟曾到桂子香
濃梧桐影轉月寒天曉

唐多令

安遠樓小集侑觴歌板之姬黃其姓者
乞詞于龍洲道人為賦此唐多令同柳

阜之劉去非石民瞻周嘉仲
陳孟參孟容時八月五日也

蘆葉滿汀洲寒沙帶淺流二十年重過南樓柳下繫船
猶未穩能幾日又中秋黃鶴斷磯頭故人曾到不舊
江山渾是新愁欲買桂花同載酒終不似少年游

臨江仙

四景

半雨半晴模樣乍寒乍熱天時榴花香逐濕風飛綠雲
翻翠浪水急轉前溪欲識清涼意思珊瑚枕冷先知
秋光預若借些兒賸催金粟開素魄好揚輝

蝶戀花

贈張守寵姬

簾幙聞聲歌已妙一曲樽前真個梅花早眉黛兩山誰
為掃風流京兆江南少醉捋白鬚人自老猶記侯鯖
舊也曾年少後夜短篷霜月曉夢魂依約雲山繞

謁金門

京口賦與歌者侑酒

歸不去船泊早春梅渚試聽玉人歌白紵行雲無覓處
剪燭寫詩無語漠漠寒生窓戶明日短篷眠夜雨寶
釵空半股

謁金門

秋興

秋興惡愁怯羅衾風弱雨線垂垂晴又落輕烟籠翠箔
休道旅人蕭索生怕香濃灰薄桂子莫愁辜酒約詩
情元落魄

鷓鴣天

樓外雲山千萬重
畫眉人隔小簾櫳
風垂舞柳春猶淺
雪點酥胸煖未融
攜手處又相逢
夜閨心事與郎同
一杯自勸羔兒酒
十幅銷金煖帳籠

柳梢青

送梅坡

泛菊杯深吹梅角
遠同在京城聚散匆匆
雲邊孤雁水上浮萍
教人怎不傷情
細屈指知心幾人
後夜相思塵隨馬足
月逐舟行

好事近

詠茶

誰斫碧琅玕影撼半亭風月尚有歲寒心在留得數根
華髮 龍孫戲弄碧波濤隨手清風發滾得到浪花深
處一甌香雪

清平樂

贈妓

忔憎憎地一捻兒年紀待道瘦來肥不是宜著淡黃衫
子唇邊一點櫻多見人顰歛雙蛾我自金陵懷古唱
時休唱西河

四字令

情高意真眉長鬢青小樓明月調箏寫春風數聲思
君憶君魂牽夢縈翠消香煖雲屏更那堪酒醒

長相思

玉一梭雲一窩淡淡春衫薄薄羅輕顰雙翠娥風聲
多雨聲多窗外芭蕉三兩窠夜長爭奈何

龍洲集卷十二

欽定四庫全書

龍洲集卷十三

宋 劉過 撰

啟事

建康獄中上吳居父時魏杭廣夫為秋官

范睢詐稱張祿蓋有所謀少游即是太虛別無他意但
可辨薰蕕之有臭不當使玉石之俱焚輒據屈抑之情
上瀆神明之聽伏念某廬陵生長湖海倦遊鼓行之老
氣不衰嫉惡之剛腸猶在漢廷重賈太傅上曾覽積薪

厝火之書江南有賀方回人爭誦芳草斷腸之句敢期
無謂亦到有司困一身於囹圄之中不勝塗炭被五木
於拘繫之下正值冰霜累知己以併臨辱長鬚而下及
若欲擢髮而盡數其罪亦有百口而莫辨其辜橫逆之
來哀鳴有以恭惟某官列三公之數帥為諸道之尊文
翁闡儒教於蜀都不聞著述常袞振文風於嶺嶠所欠
盛名唯道德之備兼數者而有之故位望之高列諸藩
而未已貂蟬才士與國全休玉璽券書其門益大此尚

今時之間有若夫前世之所無公獨一人名高千古骨
法壽天人之相精神行地上之仙不以身為將相而敢
忽於細微不以才兼文武而猶勤於學問性耽佳句無
非人間未見之詩真草行書更作天下不刊之字尊君
親而彌敬遠形勢而自疎久為戚畹之範模可作世家
之龜鑑有如登嶽尤戒多門若吳芳仲平虎委巷匪人
窮閭下走棄母親而勿待冒國恤以圖歡揮買笑之金
動縻百萬磨折簪之玉苟合再三積威暴如虎狼忽交

遊如蟻蟲鳩毒安宴蛾眉痛心但知浮花浪蕘之足觀
誓同穴死不悟冶葉倡條之微意久欲釵分氣一怒而
火攻星四馳而劍舞兇焰有如此者鋒鏖誰敢當哉韓
擒虎在門顧麗華而難戀陶朱公有意與西子以偕來
共掩其非合汚其利收數赦前之小過歷陳試後之虛
名蒼生如謝安石何事無誑取汝竟識袁彥道否王有
假時尚虞小人之多貲或陷君子於不義望冰鑑致妍
媼之察使權衡無輕重之差曾參雖未審殺人疑信尚

生於慈母赤壁若果然放火踉蹌亦走於阿瞞況在陪
都實非細事倘強橫少加於裁抑則善良始可以保全
鄒生在獄中而上言始猶寬抑召伯憇甘棠而聽訟終
覲寬平過此以還未之攸睹

代賀浙東憲

輟班省戶執節侯畿雖正己立朝殊鬱公卿之望然仁
聲載路頓寬郡縣之憂矧輔城夙被於恩光而下吏獨
依於德蔭其為幸會實倍等夷某官純粹稟安淵源飽

學詩書執禮養此心於安靜之中富貴浮雲置外物於
風塵之表曩聞治最亟奉詔還蘭臺將重於司珍禁路
行看於振羽何為起江湖之興乃致煩原隰之馳主上
仁恩舉光宣命吳中風土夙仰聲猷不俟教條之頒已
見歌謠之起某心所祈者天實為之吏士驚嗟振衣冠
於麾下妻孥竊笑失匕筋於尊前

賀留守農卿

晉膺顯擢鎮撫神臯上將秩元祀於園丘夙資彈壓公

乃兼大農之會府更藉通融步武禁途屬聯輿論某官
稟安閔達植德高明學窮百代之微眷結三朝之厚淮
壖給運帥旃分別障之威江左總戎留鑰守千門之衛
平山草木鍾阜烟雲尚懷風采之新咸聳規模之壯興
滯起廢補弊救偏使諸老大臣深恐勞精神而勿克
在長才遠識乃能用談笑以成功九重爰念於忠勤一
節暫勞於原隰列城更化四面視儀眷是行京實難敏
手國人諸大夫之議論必當屬之我公凡民百君子之

心知無以加於此命蓋將護玉輿而郊上帝陪禁從而
慶三宮然後上紫宸之班次第登黃閣之貴庸恢遠業
式慰民瞻某等以諸生得參下乏夙重蒙於恩遇近已
叨於甄收不勝踴躍之私莫盡贊揚之義豈惟今日吹
寒谷之笙竽終待來年入春風之桃李

賀徐司封兼直院

淵子

榮膺一札驟拜九遷錦署判封尚在郎官之列玉堂寓
直行為學士之真衆驚妙選之得賢獨喜斯文之有主

恭惟某才兼人之十倍學通古之百家以載鶴之船載
書入覲之清標如此移買山之錢買研平生之雅好可
知唯其超羣出類之不凡所以作賦吟詩而愈妙始宰
西昌之邑旋分南嶽之州歌陽春白雪之詩相為宋玉
之表裡和落木澄江之句孰知山谷之主賓七言嘗計
其判花一日忽傳其視草曰金曰玉定市價於己先非
鶴非風見王師之果至蓮炬光耀於落筆藥堦響動於
鳴珂欲窮箋管之賀言不過台衡之異數未知桃觀漸

驚燕麥之非更覺竹籬別有江梅之好某一無知己百
不如人但能敬宗伯而變唐文稍已厭蟲魚而箋爾雅
老矣直鈎之釣喜茲大厦之成知制誥入翰林我昔預
期於入手經品題作佳士公今當念於蒼髯詠誦之私
編摩罔既

賀廬帥程徽猷

鵬飛

陞華撤閣穩鎮巨藩駕千里之舳艫從天而下建十州
之牙纛易地則然况睽違叔子之峴山而指顧謝安之

淝水望歷陽而入境憇遺愛之甘棠道秋浦以過家依
故鄉之畫錦功名鼎盛福祿階升父子同時蓋此豈冠
之未有弟兄使敵亦今雁塞之所無譬如全家白日以
上天何異萬貫纏腰而騎鶴所以欣欣而有喜至於挈
挈以遠來以賀而言非辭可托恭惟某九華磅礴之氣
大江洶湧之才自唐虞三代以來無書不讀除李杜數
家之外其詩最工雖決科獨後於衆人而治縣獨名於
一世身處煩襍而不亂移羽檄於寡容致詰之間變生

倉卒而有謀流貨泉於不可復行之後非無館閣進文字語言之職亦有臺省叙抨彈封駁之官上念神州久淪沙漠驅虎互為之吞噬敵運浸衰獮鷗未免於先驅寇亡可待欲以英雄之士乘其機會之秋故昇之亞父所封之城而授以三國必爭之地矧合肥之所部跨全楚以雄邊若赤壁之得周郎始名出將如中原之非祖逖誰可渡江睿眷既深新除特異要當收拾人才而盡用度幾恢復境土以成功三千餘年黃河始清維其時矣

二十四考中書之令屬之公乎某幸杖履之曾陪阻門
牆而益遠有身為患幾不容於天地之間無家可歸但
落魄於江湖之上斷絕帝鄉之夢辛勤淮甸之行莫吹
寒谷之笙竽無復賞音之山水視文章為小技盡廢語
言悟富貴於儻來止安貧賤然辱泥塗而自棄者固士
之不意若見華軒而欣羨者亦人之真情訪杜甫於浣
花溪邊尚冀嚴中丞之慷慨宴王勃於滕王閣上猶希
閻都督之風流

代王掌書迎侯練教

主奉堯章自愧草茅之賤來分魯教幸從芹藻之遊輒
應一紙之書敬展諸生之禮恭惟某人才翹楚丰度整
齊學有淵源不止春育海涵之富教行場屋無非日光
玉潔之文視唾手而取功名連捋髭而撥科第以朱幢
之重鎮得絳帳之真儒寒坐客之擅誰謂廣文之官冷
側求賢之席佇看天子之詔求某老漸無聞推猶不去
識宸奎而共寶煥御墨之一新涵布韋於雲漢之中日

懷驚悸拜琬琰於塵埃之外惟謹秘藏幸先生之賜臨
使弟子之竊庇流鈴擲火永同神物之護持仰斗瞻山
更期飲食而教我

龍洲集卷十三

欽定四庫全書

龍洲集卷十四

宋 劉過 撰

雜文

為吳縣尉俞灝商卿作排青軒上梁文

夫差國大蘇為吳常秀之尊東野官卑尉處簿參丞之
底覺身外之塵埃可見奈曾中之風月自佳爰葺西偏
未為左計某精神玉雪名譽斗山蓋嘗讀萬卷之書不
自意百夫之上凝香畫戟合真之鈴閣以哦詩撾鼓水

鄉令乃以儒官而警盜納湏彌于芥子坐塗炭於朝衣
解宇甚卑難為展布園亭不治無以遊觀稍仍舊之數
椽用作新於一字門洞然而盡闢瓦鱗次而不飄窓紙
虛明簾旌搖動湖山繚繞著身圖畫之間竹桂陰森揖
客旌旗之下體因居而寢大心與地以俱平遂伸作尉
之腰少試活人之手偶留十日獲見一斑眉目娟娟烟
樹濃粧之西子衣裳楚楚荷花傳粉之六郎棋局留
殘如行道院芸香剔蠹似到館中擷蓴菜以煮羹欸已

歸之張翰持蟹螯而薦酒酌未醉之劉伶輒以從遊見
之頌述

東

子真端的有仙風壺天留得春常在臉上桃花非酒紅

西

莫憎此室尚卑棲湖水漸平風浪退一雙瀾瀾在清谿

南

老子清貧舊已甘若言富貴求而得未必玉堂如草庵

北

運會推遷今已極
閉門使學草檄書不可擒
王止擒賊

上

想見詩成更官樣
庭空吏散寂無人
消得行吟自筇杖

下

掃地焚香作清夜
維摩丈室等虛空
不是尋常縣官舍

右伏願上梁之後
仙風不老官職益高
歸直玉

堂對翻堦之紅藥
獨提椽筆草拜相之白麻雲

霄上乎九天河海潤乎千里尚期他日卧老夫
於百尺之樓何待來年庇寒士乎萬間之屋

與許從道書

九月初三日友生廬陵劉過再拜致書從道省元足下
不肖辱交下風幾年矣倒指記之自戊申及今已來日
月逾邁動經一紀君猶書生我為布衣嗚呼人生幾二
十年哉追念疇昔定交於行都也而盍簪於儀真邂逅
於金陵姑蘇行路之難中憂百罹此如人飲水冷煖自

知不可為他人言也他人讀書句讀猶未通把筆為文章模擬竄竊粗曉聲病即取高第為時達官足下試于鄉于湖南江東兩浙僅能一再中而姓名上禮部輒報罷某亦自計偕湖北之次寂寞無聞此兩人者所謂天壤間無聊之人耳交可以絕矣而相知益深嗜艾嚼蠟計足下懸懸于某已自有不可曉者而況乎僕哉方珉隱先生教學於湖也從遊之士無慮數百人然而獲親且近者亦七人執經疑難爭相雄強是固豈肯以氣下

人者足下於是時獨以春秋為諸生冠先生持文衡其
間既示人以低昂輕重之公諸生雖不敢以私議足下
而後來乃稍稍各以所長脫去場屋矣而足下名猶隸
于貢籍澹庵題名具存每一讀之不勝龍猪之嘆靜言
思之珉隱先生縉紳子哉雖然某亦豈受人欺者諸老
先生縉紳公卿與夫博洽儒雅之士至騷人墨客之流
某雖未造閭奧亦嘗涉其涯涘矣至有與其學而醜其
所為愛其辭章而不樂其行義外剛內柔首尾舛逆往

往貌是而心非之者皆是獨於足下退降俛伏之無地
自言若是則某亦自欺者而併與足下欺之哉韓退之
交游相識千百人或以事聞或以藝取或喜其一算或
以其久故至於崔羣則獨相與如骨肉兄弟不知羣何
如修飭而能取重於退之如此哉蓋足下之所挾其能
使其犁然當於心者有不獨春秋三傳而已其學正大
其文條暢而甚華其議論閎闊深遠而有餘味又深知
古今之變國家興衰成敗之數與之談及邊亭障堠戰

守形勢又有洞然而不駭且其性識明敏不詭隨雷同
初視之若毅然有不可犯之色而其實和平樂易善與
人交若掩覆其所短彌縫其所長乃如某者落魄不檢
諸所交游者莫不厭而惡之謗怒嫉罵叢至沓來足下
恬不加怪待之如初此某所以感激悲嘆其深相知者
大畧如此而其不知者可勝悼哉今年夏偶來東陽東
陽足下之鄉里某始獲拜其親識其子弟與其厚善者
游詳聽審觀又知足下之處鄉里者靜重而寡合雖然

君貧於家與某之窮於途者不同某唯一身上下聽其
意之所欲適從足下則不可也足下客諸侯亦久矣而
卒無所成田園荒蕪親老而食者衆言而聽唱而和者
為誰歟開心胸濟緩急者誰歟夫使我有為而人順
受開心見誠洞融有無患難相濟者不徒爾也必先豁
然有以示人不疑鳴鳥兩忘然後木石頑樸者尚可感
動而況於有情哉今足下之才不患其少某猶為足下
不滿者器局似未甚開廣有所欲言輒慚慙退縮而不

自安得非坐一貧賤故戚戚憂憤朝夕徬徨若將有物以掣肘者其此等意態必能成病郭林宗隱不違親貞不絕俗足下蓋嘗尚論林宗而友之者而欲隱貞而違親絕俗乎抑姑取其名而忘其實乎某本非放縱曠達之士垂老無所成立故一切取窮達貴賤死生之變寄之杯酒浩歌痛飲若無人意得有所逃者於是禮法之徒始以狂名歸之某亦受而不辭比之足下孤介峻潔視天下事皆不屑為者豈不萬萬相遠然某誠恐拘攣

已甚則近於自隘偏於執方則所行必多滯古之通材
達人宜不如此某坦蕩不羈雖不可以為法然而與足
下不用於時均也但差樂耳以吾之所有易足下之所
無藥其膏肓之疾而起之亦朋友切磋琢磨之義也昔
杜征南有左傳之癖足下於傳可謂通矣豈尚有所謂
癖耶正言程冬老丁未歲尉長興時為某言今天下惟
四常某聞其言而甚驚冬老之言曰夫婦父子兄弟君
臣此四者不可易之道獨朋友一常為不講故曰惟四

常由今觀之冬老致身雲霄之上某亦豈無半面之雅
而辱在泥塗邈如路人朋友之道講不講何如也栖栖
異鄉與足下兩窮相值某此心又未知足下於何歲年
會於何處而試於何地而得失為何如朋友一常尚冀
他時足下共商畧之有懷千萬書不盡言不宜某再拜

贈徐子容說

東陽山水之窟其民健而善鬪其士大夫力學而有氣
節風聲所樹大略如此竊嘗試以他縣人才計之在閩

浙間未為極盛倒指而數由今文武兩科而仕者一千
餘人比吾江西亦云多矣然而通顯於朝者寥寥而未
聞而名實孚於天下者亦罕見推原其由豈非世家少
而師道不立之故歟國朝韓呂以元勛厚德居河之北
山之東其後碩大繁衍散四方多至百胄而千甲彼非
皆習訓詁業文章蓋其文獻典型深入肌骨故子孫感
其化見之設施不容有擾攘之私英偉雋特之士困伏
草莽無_闕講學河汾當隋末以自見王氏從容義理

相與房杜姚薛輩優柔厭飫於詩書禮樂之中一旦李
唐勃興時人景從以功業發身者其門子弟居半嗚呼
此豈區區口舌論說者所能致哉吾友徐子容此邦之
著姓也其兄弟子姪亦浸有貴者今又移以其道淑諸
人開門授業徒戶外屨滿此宜某之所加敬而不敢竊
議者今猶續追是說豈非王謝子弟貴于是聞以退之
而為師且有卑位之羞歟吾觀子容質直而甚文和易
而有位此可以師者其後有能自經義詞賦之外以吾

說推之則謀王斷國之論致君澤民之業出將入相之才蒞官行德之方他日之所成就當不止此毋徒曰吾計止應科舉圖官職而已年日月劉過說

龍洲集卷十四

欽定四庫全書

龍洲集卷十五

附錄

序跋

閻風先生跋

予友劉改之少負不羈之才加以邁往不屑之韻落魄
一世傲睨萬物怒罵嬉笑皆成文章斗酒百篇佇立可
就有志無時用勿克施賁恨而沒詩亦隨手散失百不
存一二予嘗過岑峒山於郵亭僧舍得其詩五六十首

刻於潛川類集恨未能會粹其餘也方會方岩先生出
帥江西之明年其弟潤之後錄一篇并手跡數紙乃往
歲送公還鄉所賦公軫公叔把臂之象與羊舌下位之
仁跋以妙語亟代堅珉刻於廬陵郡齋雖山陽晚笛之
感高山流水之思楊巨源之說項斯杜牧之李長吉
之敘由今視昔尤切有榮耀焉改之縱沒猶生之年也
改之名過太和人也閭風劉侯誌

東陽遊戲序

慶元己未夏六月廬陵劉改之來遊東陽凡月日得詩
文五十餘篇將行集之因為之序子以為山川人物固
豪傑之士所樂觀而願識者然貧困征行山川過目輒
失向背交遊滿前其味平生雖所願樂蓋亦未易得也
改之遊吾鄉往來石洞清潭山谷間盤礴邑里賦詩最
多邑之善士莫不傾接探幽發秘却短從長與夫風俗
美惡興亡廢存固已盡得之矣然而改之貧自若也司
馬子長游天下其所以求於世者與我異倦而遊老而

文始竒改之讀書論兵好言今古治亂盛衰之變與予
交二十年今老矣未嘗一日不遊也每見則氣益壯詩
益振文益古蓋其所得乎天者富貴不足以累其心故
能驅役山川戲弄人物劇談痛飲遺世自賢亦與造物
者遊而未知所止也其與子長孰後先乎詩文一編遂
為東陽故事凡吾鄉之識改之當不忘也秋九月朔許
從道序

殿撰侍郎王安撫詩

名滿江湖劉改之平生窮寂但吟詩人言季布恐難近
我謂鄭老真吾師試令滿飲至酩酊愈覺高論生神奇
豪家有錢不識寶貧者識之空嗟咨

其二

劉子堂堂七尺軀高談世事奮髯鬚觀渠論道前賢處
據我看來近世無出語令人驚辟易處窮無鬼敢揶揄
徜徉鬧市真無畏要是人間烈丈夫

其三

不識劉郎莫便誣酒酣耳熱未全疎士當窮寂能無慊
我自斟量愧不如橫槊賦詩猶未有輕裘緩帶特其餘
當今四海無塵土宜有奇才在草廬

陳狀元同父詩

劉郎飲酒如渴虹一飲澗壑俱成空胃中壘塊澆不下
時有勁氣噓長風劉郎吟詩如飲酒淋漓醉墨濡其首
笑鞭裂缺起豐隆變化風雷一揮手吟詩飲酒總餘事
試問劉郎一何有劉郎才如萬乘器瓠落輪囷難自致

強親舉子作書生却笑書生敗人意合騎快馬健如龍
少年追逐曹景宗弓弦霹靂卧鷗叫鼻尖出火耳生風
安能規行復矩步斂衽厭厭作新婦黃金揮盡氣愈張
男兒龍變那可量會須勒取燕然銘金甲牙旗歸故鄉
故人陳同父未魁天下時與余皆落魄不振一
日醉於澹然子樓上作此詩相與勞苦明年同
父唱天下為多士第一嗚呼同父死又幾年而
劉子尚為書生每誦此詩幽明之間負此良友

竹隱先生徐侍郎詩

江西詩社久淪落晚得一人劉改之不向嶺頭拈取去
此衣此鉢付他誰

其二

謫仙昔者號無敵侯喜中間還有聲後五百年無繼者
得渠一句便堪驚

其三

一生能著幾兩屐萬戶何如千首詩竹隱在旁湏逕造

醉鄉有路莫他之

其四

風吹客袂遊甘露雪打人頭入半山無故被他林鳥覺
競傳新句落人間

其五

閉門長安十日雨車馬不來蛙最多若往澹然應子是
作商聲者必君歌


東陽呂英父詩

襄陽劉子謫仙儔揮斥寰宇却寓遊醉眼芒羊天地窄
吟魂淒蕩鬼神愁生來不帶封侯骨老去徒深活國謀
旦暮風塵起河朔未容埋沒委山丘

呂大方以改之下第賦贈

劉郎氣豪酒豪詩更豪乃肯折節作賦遺恨無纖毫詩
雄賦老不入世俗眼仰空大叫索酒歌離騷劉郎新詩
今莫敵挑戰梅杜無遺力果然桃杏一山開龍馬行天
曉無跡錦標重奪更一年却來走馬春風前撐腸文字

五千卷吟哦得意揚修鞭世間榮辱俱遊戲莫為功名
銷壯志我輩胡顏自古然劉蕡况是公家事銀杯錦被
驕驕裘呼童換酒麈窮愁自憐却被散官縛不及相從
上酒樓



龍洲集卷十五